


## LOU CHIR J. OEUVRAY E TÇHITTIE CI MONDE



En ci mois d'octôbre, di temps que les bôs s'pieûmant pô è pô, c'te novèlle ât tchoèe tot d'in côp : Jacques Oeuvray ât moûe, lai-vâ en Aifrique, duraint enne envèllie â Cameroun !

Nôs n'poyans y crairè po ècmencie, mais ç'ât bîn lai voirtè qu'è fât aidmâtre : nôs ne v'lans pus vouère ne ôyi c'te boègne dgen, c't' aïmi dâs tôte, ci marvoiyou patoisaint. Ç'ât c'ment in veûde sains meûjure que nôs envôj'ne, nôs s'trovans c'ment des oûrfenats.

Mitnaint J. Oeuvray é r'trovè l'Aidjoûe qu'èl ainmait taint, èl é r'trovè âchi dains l'âtre monde les dyès patoisaints païchis aivaint lu. Mains è nôs é léchie in moncé de seûv'nis pus aibiéchains les yuns qu'les âtres : ses céyébres masses en patois, les fêtes et les

djoyous r'pés paitaidgis .

En r'musaint è tot çoli è nôs vînt tôte lou sôri. Poèch'que J. Oeuvray était cognu po ses riôles en patois qu'an aittendait âch'bîn â môtie qu'âtouè d'lai tâle. È saivait les dire et les faire è saivurie. Po qu'è d'moèreuche encoé enne boussée daivô nôs, ran d'meu que d'en r'bèye « enne p'tète ».

*« Lou Totor, ç'ât in apchar, en l'écôle è n'fait ran d'bîn, ç'ât in nitçhou qu'aimuse les âtres. Dâli lai maitrâsse lu bèye s'vent des révoues. Ci djouè-li lou Totor daivait graiy'naie « lou verbe vouère è tos les temps » qu'è dit lai rédgente. Ma fri en l'hôtâ son père y é fotu enne niaffe et peus l'é oblidge è ci tyraivaiye. Lou djouè d'aiprés, tiaind qu'èl é r'bèye son ôvraidge, lai maitrâsse ât aivu bîn écâmie. Totor aivait graiy'nè :  
I vois tiaind qu'è fait bé temps  
I vois tiaind qu'lou temp sât peut  
I vois tiaind qu'è pieût  
I vois tiaind qu'è nadge  
I vois tiaind qu'è dgeâle ..... »*



Méchi, chir Oeuvray, te nôs é fait lai vétiaïnce pus bèle !